

中华历代

名医医案

全库

鲁兆麟 主编



『十二五』国家重点图书出版规划项目

中华历代

名医医案

全库

中



鲁兆麟◎主编



『十二五』国家重点图书出版规划项目

目 录

肾病卷

第三十六章	淋证	1326
第三十七章	水肿	1363
第三十八章	关格	1424
第三十九章	腰痛、腰酸	1429
第四十章	遗尿、小便不禁	1439
第四十一章	尿浊	1445
第四十二章	消渴	1452
第四十三章	虚劳	1479

心病卷

第四十四章	惊悸、怔忡	1538
第四十五章	心痛、胸痹	1566
第四十六章	不寐	1584
第四十七章	多梦	1628
第四十八章	多寐	1632
第四十九章	昏迷	1633
第五十章	癫狂	1649
第五十一章	癫痫	1683
第五十二章	烦躁	1700
第五十三章	痴呆	1702
第五十四章	百合病	1703
第五十五章	汗证	1704

肝胆病卷

第五十六章	黄疸	1722
第五十七章	臌胀	1762
第五十八章	疟病	1785
第五十九章	胁痛	1808
第六十章	眩晕	1837
第六十一章	头痛	1886
第六十二章	中风	1941

附：口僻	2027
第六十三章 颤证	2032
第六十四章 肝著	2033

血证卷

第六十五章 咳血	2038
第六十六章 吐血	2120
第六十七章 便血	2174
第六十八章 尿血	2211
第六十九章 紫斑	2223

痿痹杂证卷

第七十章 痿证	2228
第七十一章 痹证	2255
附：历节病	2333
第七十二章 郁证	2343
第七十三章 瘀证	2356
第七十四章 厥证	2360
第七十五章 脱证	2389
第七十六章 痰饮	2401
第七十七章 积聚	2494
第七十八章 内伤发热	2523
第七十九章 麻木	2541
第八十章 脚气	2545
第八十一章 夹阴伤寒	2562
第八十二章 暑风	2566
第八十三章 阴暑	2569
第八十四章 疰夏	2570
第八十五章 麻疹	2571
第八十六章 疔腮	2574
第八十七章 沙蛾	2582
第八十八章 漏风	2584
第八十九章 风湿	2585
第九十章 脾瘵	2588
第九十一章 肺痿	2589
第九十二章 肺液	2591
第九十三章 肠癆	2592
第九十四章 肠痹	2593
第九十五章 肝叶倒竖	2594

第九十六章 积气	2595
第九十七章 遍身气胀	2596
第九十八章 冲气	2597
第九十九章 真阳内动	2598
第一百章 虚阳上浮证	2599
第一百零一章 热深厥深证	2603
第一百零二章 伏热证	2604
第一百零三章 伏阴证	2605
第一百零四章 饿病	2606
第一百零五章 除中	2607
第一百零六章 脏结	2608
第一百零七章 水气病	2609
第一百零八章 身痛	2610
第一百零九章 鹤膝风	2611
第一百一十章 四肢痛	2616
第一百一十一章 痛膈	2621
第一百一十二章 周身跳动	2622
第一百一十三章 周身发冷	2623
第一百一十四章 背冷	2625
第一百一十五章 足热	2626
第一百一十六章 无脉证	2627
第一百一十七章 痰证	2628
第一百一十八章 健忘	2633
第一百一十九章 相思病	2634
第一百二十章 脏躁	2635
第一百二十一章 失魂证	2636
第一百二十二章 笑病	2637
第一百二十三章 哭病	2638
第一百二十四章 祟病	2639
第一百二十五章 尿多	2640
第一百二十六章 男子阴吹	2641
第一百二十七章 扼死	2642
第一百二十八章 溺水	2644
第一百二十九章 多唾	2645
第一百三十章 神呆恍惚	2646
第一百三十一章 奔豚气	2647
第一百三十二章 狐惑病	2654

肾病卷

第三十六章 淋证

王三尊

朱道人，年六十余，患淋，遍服利水药不效。予思年高气弱，不能运化，兼以暑热，故尔。遂以补中益气汤加牛膝、车前、赤苓、泽泻等，一服，随出瘀血半碗，时人已皆不知其为血淋也。及见出血，道士张伯传以为予药所致，归罪于予。予云：“用补药下血，此系佳兆。”彼以为不然。令道人回家调治，恐死累己。未半月康强如故而至矣。

《医权初编》

周南

西村嘉右卫门，年四旬余。三年前患小便淋浊，服土茯苓甚多，以致左髀骨上肿硬筋急，骨反外突，膝肿腿瘦，筋挛骭响，不能行立，且不可坐。诊之脉，两手反关。余思淫邪之火郁于少阴、厥阴，则为淋、为浊，讳生毒疮，而服劫药，但图皮外之光，不知筋骨之害，及多服土茯苓无济于病，血气既伤，血不荣筋，筋挛骨突，而现奇证也。治宜养血温经，纯以浊阴走脏之药，壮足少阴之水，封填骨髓；生足厥阴之血，濡润诸经。方以熟地、杞子、萸肉补肾为君，当归、丹皮养肝为臣，附子温经为佐，木瓜、牛膝、独活引经为报使，加苍术为阳明之要药。其所以必取阳明者，以阳明为五脏六腑之海，行气于三阳，所以筋骨、肌肉皆受气于阳明也。服至十剂，腿膝筋舒，屈伸觉利，前不可坐者，今可正坐矣。又五剂而行止自便，不待扶杖矣。自九月二十一日服起，至十月初五日止，煎药十五剂，每剂重一两，见其效速，不必加减。三年之病半月而收七八分之功，亦大快事也。继以八味地黄丸调养之。

古闲平兵卫，三十四岁。姿禀亦清，多年患淋浊周身，遂致历节疼痛，四末犹可，腰背为甚，逢夏湿热之令病则愈重。脉沉数而涩。沉数为内热，涩为血少，亦为有湿。风寒湿杂合而为痹，即令之痛风。间有风火，亦有血虚，然皆不离乎湿也。治当责之肺，肺以行治节、通水道，浊自清而痛自己。方以桔梗、甘草、桑白皮、地骨皮、半夏、陈皮、苍术、秦艽、桑枝，半月而病去四五分，月余而愈六七。乃服二陈汤加当归、玉竹两月，脉亦和平，更以补气血之药，少佐治风湿者，百余日痊愈。

以上出自《其慎集》

北山友松

纪州大井氏，壮年患浊。茎痛发疳，愈后清汁不干，梦遗。令服忍冬草一斤余，脉数而弦，兼患淋浊，阴囊左边肿核。

初用方：当归尾 川芎 黄柏 甘草梢各三分 忍冬五钱 肉桂 橘核 牛膝各二分

次用方：黄芩 黄柏 肉桂 龙骨 车前子 当归 熟地黄 山栀子 黄芪梢 甘草梢 牡蛎 柴胡 辰砂

次用方：白术 肉桂 茯苓 泽泻 猪苓 木香 川楝子 苏木 木通 槟榔子 橘核 川芎 生姜 盐 茴香 莲肉

次用方：补中益气汤合五苓散加橘核、酒黄柏、吴茱萸、生姜、盐、车前子、茴香。

次用方：黄芪 莲肉 人参各二钱半 黄芩 麦门冬 地骨皮 车前子各一钱半 附子 肉桂 槟榔子 熟地黄 山茱萸 山药 泽泻 牡丹皮 青皮 橘核

次用方：八味地黄丸料加橘核、延胡索、茴香、川楝子。

终用方：同方加石菖、甘草、乌药、益智、盐、龙骨。

《北山医案》

吴箴

少农陈鉴轩，患淋浊经年，痛涩虽除，而膏液不已，且神疲气怯、食少懒言。凡清火疏利之剂，靡药不尝，病势日甚。余诊之曰：脉沉迟弱，皆由耗伤真阴，脾肾亏损，中气下陷，命火阳衰，下元不固使然。即宜朝服补中益气汤，晚进八味地黄丸加人参。但当温补元阳，则淋浊自可渐止。

文，溺出浑浊如脓，尿管痛不可忍，尺脉数大。想系房劳强忍精血之伤，致有形败浊阻于隧道，故每溺而疼，所服清湿热、利小水之剂无效者，以溺与精同门异路耳。即服地髓汤，一名苦杖汤。用杜牛膝一两捶碎，以水二盅，煎浓汁一盅，去渣入麝香少许，空心服。以麝香入络通血，杜牛膝亦开通血中败浊也。连服数剂而痛浊皆除。

严正钦述溺血三月，赴吴门就医，教服两头尖、猪脊髓、龟胶、鹿胶、海参淡菜膏无效。且痰多食减，胃脘满闷，小便赤色带血，溺管淋痛。余曰：脉数滑大，乃下焦结热，热甚搏血，流入胞中，与便俱出而成血淋，方书云：凡血出命门而涩者，为血淋；不痛者多为溺血是也。当投小蓟饮子加牛膝、海金沙，服十数剂，便清血止。惟茎中气虚下陷，清阳不升，改服补中益气汤及归芍六君子得痊。

以上出自《临证医案笔记》

何书田

阴虚湿热下注，遗溺沙淋并发，君相二火内炽，六脉细弱。当用知柏八味法。

大熟地 炒知母 山药 牡丹皮 泽泻 白莲粉 炙龟板 炒黄柏 茯苓 川草薢 牡蛎

少阴络伤，膀胱气滞，所以小溲作痛。茎中上连少腹，若不通利，终恐溺后带血。青年患此，非旦夕可以奏效。

原生地 川连 炒黄柏 甘草梢 赤苓 琥珀末 炙龟板 知母 牡丹皮 车前子 泽泻

复诊：前用滋阴通便法，小便已利，少腹胀满渐松，而下元不固，梦寐中连次遗溺。此气

虚不能摄阴也，法当气阴并补。

西党参 炙甘草 炒生地 牡丹皮 南芡实 制于术 白茯苓 沙苑子 淮山药 煅牡蛎

阴络内伤，溺浊久缠，兼下血块，真水亏竭也。急须节劳调治。

炒阿胶 牡丹皮 川断肉 煅牡蛎 茯神 枣仁 炙龟板 炒知母 怀山药 象牙屑 远志 柏子霜

肾主两便，小溲淋漓而大便不爽，非阴虚而何？脉左尺沉细，此其明证也。

上肉桂 淡苡蓉 肥知母 炒怀膝 车前子 大熟地 白归身 炒黄柏 广陈皮 琥珀末

阴虚溺痛，以滋肾法加味治之。

上肉桂 炒熟地 萸肉 炒黄柏 泽泻 血珀末 西党参 炙龟板 知母 车前子 茯苓

以上出自《解山草堂医案》

王孟英

陈芰掌，患淋久不愈，延至溽暑。孟英诊之，曰：易事耳。予补中益气汤而愈。

周菊生令正，患少腹酸坠，小溲频数而痛。医投通利不效，继以升提温补，诸法备试，至于不食不寐，大解不行，口渴不敢饮水，闻声即生惊悸。孟英脉之，曰：此厥阴为病也。不可徒治其（足）太阳。先与咸苦以泄其热，续用甘润以滋其阴，毫不犯通渗之药而愈。

胡振华，以花甲之年，患溺后出血水，甚痛。自云：溲颇长激，似非火证。孟英察脉有滑数之象。予元参、生地、犀角、（山）梔、楝（实）、槐蕊、侧柏、知母、花粉、石斛、银花、甘草梢、绿豆等药，旬日而痊。逾四载，以他疾终。

陈足甫，溲后见血，管痛异常，减餐气短。孟英以元参、生地、知母、楝实、银花、侧柏叶、梔子、桑叶、丹皮、绿豆为方，藕汤煎服，二剂，病大减，乃去丹皮、柏叶，加西洋参、熟地，服之而痊。

朱湘槎令媳，患溲涩痛，医与渗利，反发热，头痛，不饥，口渴，夜不成眠。孟英诊之，脉细数。乃阴虚肝郁，化热生风，津液已烁，岂容再利？与白薇、梔子、金铃（子散）、知母、花粉、紫菀、麦冬、石斛、菊花，服之即愈。

许培之祖母，年逾七旬，久患淋漏，屡发风斑。孟英持其脉，弦而滑，舌绛口干。每以犀角、生地、二至（丸）、（黄）芩、（青）蒿、白薇、元参、龟板、海螵（蛸）之类，息其暴；甘露饮增损，调其常。人皆疑药过凉。孟英曰：“量体裁衣”，病属阳旺，气血有余，察其脉舌，治当如是。病者乃云：十余年前，偶患崩而广服温补，遂成此恙。始知先天阳气虽充，亦由药酿为病。

秋杪，患寒热如疟，善怒不眠，苦渴易饥，却不能纳食。孟英察脉，弦数倍常，予清肺蠲痰，柔肝充液之法，渐以向安。

今冬，有荐吴古年诊治者，询知病源，作高年脱营论，而以“血脱益气”裁方。初服三四剂，饮食骤增，举家忻幸。已而血漏甚多，眠食欲废。复延孟英视之，仍主前议，果得渐康。

运粮千总马香谷，患溺闭欲死。所亲赵春山司马，延孟英视之，脉坚体厚，口渴苔黄。投知（母）、（黄）柏、梔（子）、楝（实）、犀（角）、（紫）菀、（瓜）蒌、（竹）茹之药，送当归龙荟丸而瘳，竟不复发。

以上出自《王氏医案》

林佩琴

族某。劳淋，初用分清饮，涩痛已减。后服单方，通利太过，反致溺后精沥，腰足酸软，畏冷，左脉虚涩少神，肾气不摄，乃成虚滑，摄固为宜。沙苑子、菟丝子、杞子、莲子、破故纸、熟地（砂仁末炒）、杜仲。数服而效，后加鹿胶、潞参、归身、茯苓、山药，乃固。

王。便浊而数，且痛，午后寒热不时，头眩神倦，脉弱，自秋延春，兼溺血点。乃劳力伤阴，阴火迫注膀胱。先用分利法，导赤散加赤苓、莲须、归尾、赤芍、丹皮、梔子、灯草。二服眩痛止，去木通、竹叶，改熟地、归身，又加草薢，三服诸证俱瘳。又令服六味丸愈。

陈。色苍体长，木火之质，阴分易亏。五旬外纳宠，急图嗣续，月前因浊成淋，溺数而欠，著枕仍然遗泄，延至血水滴沥而痛，是为血淋。精室既伤，心火犹炽，诊两尺左弦右数，宜腰膝酸软，足心如烙也。夫不痛为溺血，痛为血淋。虽肾虚挟火，然导赤分清，如方凿圆枘，五苓八正，亦抱薪救焚。急用生料六味作汤，可济燃眉。熟地六钱，生地三钱，怀山药（炒）二钱半，茯苓三钱，丹皮、泽泻各一钱，生莲子（不去心）一两，莲子须、麦冬各二钱，五味子五分。数服痛止淋减，汤丸兼进而安。

江。溺前涩痛，茎端宿有瘀腐。向服瞿麦汤痛减，导火下行故也。然脉来洪实搏指，不特膀胱瘀热未尽，抑且心肾根源未清，故痛减淋不减也。宜收心节欲，勿扰肾脏，戒酒薄味，静养可安。茯苓、生地、石斛、草薢、莲须、甘草梢、灯心、泽泻。数服而效。

以上出自《类证治裁》

蒋宝素

精败为浊，水腐为淋。淋出溺道，浊出精道。阴亏火盛，湿热互扰，淋浊交流，涓滴作痛。泄中寓补，通以济塞主之。

大生地 木通 生甘草梢 滑石 粉丹皮 福泽泻 云茯苓 怀山药 山萸肉

昨服导赤、六一之泄水，六味地黄之补肾，泄中寓补，通以济塞。夜来淋浊皆少，平旦至日中较轻，日中至黄昏亦减，玉茎痛涩亦缓，溲色夜黄昼清，已获效机。依方进步。

大生地 粉丹皮 福泽泻 云茯苓 车前子 怀牛膝 白通草 琥珀

依方进步，又服四剂，淋浊悉平。惟阴茎时觉微疼，肝肾阴伤未复，湿蕴余热未清。再以六味、三才、二至，以善其后。

大熟地 粉丹皮 福泽泻 怀山药 山萸肉 云茯苓 天门冬 人参 女贞子 旱莲草

年甫二十三，六岁时，暑月闭癰，涓滴作痛，溲赤带血，乃热郁也。以后每年发一两次，十岁外逐次较重。溲浑赤中有血丝，血块鲜瘀不一，玉茎痛塞半月方平。今春三月完姻后举发，血色鲜红，痛甚。痛则为血淋，乃阴分重亏，水不涵木，木复生火，火逼精关，危候。拟医话竭淋煎加减主之。

大生地 赤茯苓 建泽泻 怀牛膝 车前子 篇蓄 瞿麦 滑石 生甘草梢 血余炭 藕汁

三进加减竭淋煎，血淋痛涩俱平。盖不药亦尝自愈，每发不过十余日即已。郁热随血而解故也。久之郁热复聚，肝木复燥。肝主小便，乙癸同源。水不济火，火烁金伤，清肃不降，移热膀胱，气化失常，故屡发不已。病势已退，当专补阴。少壮年化，戒之在色。

大熟地 粉丹皮 福泽泻 怀山药 云茯苓 琥珀 怀牛膝 血余

为末，水叠丸。早晚各服三钱，灯心汤下。

以上出自《问斋医案》

曹存心

膏淋、血淋同病，未有不因乎虚，亦未有不因乎热者。热如化尽，则膏淋之物必且下而不痛，始可独责乎虚。

大补阴丸加瓜蒌、瞿麦、牛膝、血余。

治按：议论隽爽，方亦切实。

再诊：所下之淋，薄且少矣，而当便之时，尚属不利，既便之后，反觉隐痛，肢膝不温，脉小弦，唇红咽干。热未全消，虚已渐著。

瓜蒌瞿麦去附汤，加麦冬、萆薢、黑梔、猪脊筋。

治按：便后隐疼、膝冷咽干，皆虚象也，似当兼用滋养。

《柳选四家医案》

何平子

上焦热郁，烦渴不止，津液下陷，小便浑浊，宜用甘寒固摄法。

玉竹 天冬 麦冬 萆薢 牡蛎 泽泻 厚生地 沙参 知母 芦根

换方：鲜生地 升麻 五味 制洋参 丹皮 天冬 麦冬 牡蛎 萆薢 芦根

肝胆热郁，并真火衰微，以致下注溺痛，小溲解而不畅。诊得脉象右弦左软，宜用温润苦泄法。

川连 萆薢 苡蓉 柏子霜 泽泻 肉桂 赤苓 升麻 甘草梢 冬瓜子

复：脉象紧大不柔，并腹鸣脾泄，无疑木火内炽也。仍用苦泄分理法。

炒川连 云苓 甘菊 甘草梢 小青皮五分 萆薢 生牡蛎 炒车前 白扁豆 冬瓜子

又复：气府挟热。

生于术 黑山栀 赤苓 生扁豆 秦皮 萆薢 炒苏子 生米仁 小郁金 白莲须

又复：上焦积热，右脉紧，大便溺不爽。宜升清泻热，徐徐安痊。

生洋参 块茯苓 琥珀屑 小郁金 淡黄芩 生于术 炙升麻 生米仁 海金沙 白螺蛳壳

以上出自《壶春丹房医案》

费伯雄

某。阴分久亏，湿热下注，溲溺作痛。治宜清利。

南沙参 天门冬 赤茯苓 生苡仁 粉萆薢 鲜首乌 车前子 瞿麦穗 川石斛 天花粉 甘草梢 怀牛膝 细木通 粉丹皮

某。血淋日久，溲赤溺管作痛，坠胀不已，气虚阴亏，湿热不化。

西洋参一钱 甘草梢八分 川升麻五分 归身二钱 广皮一钱 生地三钱 猪赤苓各二钱 柴胡一钱 山药三钱 泽泻二钱

某。脾肾两亏，湿热下注，小溲淋浊。宜培脾肾，兼以利湿。

细生地四钱 淮山药三钱 云苓二钱 女贞子三钱 黑料豆三钱 潼沙苑三钱 川萆薢二钱 瞿麦三钱 知母一钱半 牡丹皮二钱 甘草梢五分 统车前三钱 川黄柏一钱半

某。脾肾两亏，夹有湿热，小溲赤色，如泥水不清。急分利湿热。

天冬二钱 生地四钱 丹参二钱 丹皮二钱 花粉三钱 萆薢三钱 海蛤粉三钱 赤苓二钱 生苡仁四钱 通草五分 车前子三钱 竹叶二十张

某。脾肾两亏，小溲淋漓。宜固本和中，兼纳下元。

潞党参 川杜仲 焦白术 桑螵蛸 补骨脂 全当归 陈广皮 云茯苓 杭白芍 佛手柑 黑料豆 佩兰叶

以上出自《费伯雄医案》

李铎

辛亥治一农人，年二十余，患尿血茎痛，服琥珀散及五淋、血淋诸方无效。余捡古方，以陈右灰炒黄连二两，去灰，取连为末，梧桐子大，用竹青、白茅根煎五苓散，吞黄连丸，旬日而愈。

《医案偶存》

浅田惟常

一商家仆年二十岁，患脓淋数日，时时发微寒热，饮食少进。诊之，脉沉小而数，腹中无病，第似神色不太乐者。予以为肝经湿热，与龙胆泻肝汤。后十余日忽走使曰下血数升，命在须臾，余仓皇往诊。仰卧褥，气息绵悒，六脉洪数而虚，急灌独参汤，下咽即吐。寻之干呕，额汗淋漓苦闷，吐蛔七条，试作小半夏加茯苓乌梅蜀椒汤与之，呕逆益甚。余沉思谓孙思邈以单甘草止吐，今用之蛔必安。因如法服之，吐忽止，气息稍平。时看护者将更褥，除污物，披衣视下体，阴囊破坏，有孔如刺，双卵坠在褥，其大如鸡蛋而稍扁，色白而红缕缠绕，众惊愕报予。予曰，昔江篁南以阴囊破裂为千古稀见，况阴丸脱落者，可谓奇中之奇矣。虽然，人有阉，豕有羴，此皆割势而犹能生。此人霉毒结于阴囊，故有此变，调护得宜，当不死，后调理果愈。

《先哲医话》

黄堂

金，素患淋浊，肾阴亏乏，久久湿邪下注，海底结痈，舌黄滑腻，脉形弦数。经云：阴亏者阳必凑之，至阴之地，龙相所居，泻南补北，莫如丹溪，是为探本之道。

大补阴丸加茯苓、广皮、薏仁、丹皮、泽泻、炙川柏、海金沙。

二诊：前议湿热下陷于两阴之间，其化以火，阴中有阳，在象为坎为水也。湿邪同气相求，由来也渐，结痈垂成。东垣云火为元气之贼，一胜则一负，故舌苔腻厚，胃纳减少，便溏稀水，皆是咎征，脉仍弦数，身热往来。再用苦辛相合，能降能通之道。

川连 赤苓 黄柏 萆薢 丹皮 广皮 半夏 泽泻 苦参 薏仁 通草

三诊：疡溃而诸证俱获向安。然肾阴久亏，脾元又困于湿热，故二便虽分，舌仍腻浊也，脉病尚合，宗薛氏加减六味，为脾肾两顾之意。

六味丸去萸肉，加于术、半夏、陈皮、杜仲、菟丝饼、萆薢、薏仁。

《黄氏纪效新书》

张仁锡

顾次香患血淋两月余矣。溲便必先凛寒，形瘦食减，自服滋肾养营之剂不效。医以为若不通利州都，则湿热从何而去，因用生地、萆薢、木通、石韦、车前等味，病反增剧，最后索治于余。诊其脉沉细而弱，两尺为甚，观其色则瘀晦无光，不鲜不紫。余曰：“此膀胱虚寒，阳不化阴之候。”用金匱肾气丸，每服三钱，以党参、当归、血余炭制丹参作汤送下。连进数剂而痊。丹溪谓诸淋皆忌补，此说余不敢深信。

《清代名医医话精华》

吴达

周少愚，湿热淋痛，脉象弦细而数。夫弦为风木之象，郁而生火则数。木火郁于湿土，湿

被木火蒸淫而为热；木生风火，不得上升，下注而泄于小便，则成淋浊。其下注者，风之力也；痛甚者，火之郁也。方用术、苓等以理脾；亦用柴、桂等以升木；其下陷之火，用丹皮、梔、柏以清之。两剂痛定，而余沥未清，前方去丹皮，减柴、桂，病如失。

《医学求是》

许恩普

徐颂阁侍郎三公子于甲午岁淋证。他医误以血淋，苦寒之药，数月病剧。卧床不起，身不能动将一年矣。延余诊视，仅存一息，脉沉细，知为阴亏变色，非血淋也。诘其故，言无外务，以妻归宁浙省病，年不归，思想而得。余曰：“欲心一动，精即离舍成淋。久则阴亏变色，误为热淋，治以寒药，至于此极。”拟以人参菟丝丸加减，大补之剂以固心肾，一服见效。复诊加减数服能食，月余痊愈。

《许氏医案》

陈菊生

小便不通，有寒热、痰湿、气血、虚实之分，惟淋证则多属于热，寒者绝少，盖热甚生湿，故水液浑浊而为淋也。庚寅冬，余至济南，有徐某来延余诊，据云，小腹胀满，尿涩不通，日夜涓滴，色赤而浑，病经五年，屡治不效，今夏忽重，入冬尤剧，尿后茎痛，下气上逆，喘息不堪，余切其脉，诸部濡数，惟左关尺数大，按之有力，知病久气血虽亏，膀胱湿热仍盛，遂用参、芪、术以益气，地黄、黄柏以养阴，制军、甘草以清热，滑石、木通以利湿，僵蚕以化秽，青皮以行气，牛膝以下引，葛根以上升，标本兼顾，随证减增，数十剂而病愈。壬辰夏季，余寓都门，有刘某患浊，日夜淋漓不尽，前茎有筋胀痛，后连肛门，已十余日，余诊之，脉象滑数，知是浊邪正盛，治以涤荡之峻剂，下紫黑脓血无数，半月而愈。可知淋浊治法，初起即予荡涤，其病易疗，如后证是也。惟恐治不如法，邪气留恋，势必频连不愈，如前证然。或问前证治法，余曰：此为复方，方中有阳有阴，有温有清，有补有泻，有降有升，一阖一辟，理最元妙。征之古方，殆东垣清燥汤意乎？在东垣制此汤，所以治体虚夹暑，与一切湿热证，非为淋证设也。然淋至数年，正气已虚，入夏病加，暑邪自盛，尿浑茎痛，湿然尤多，按之清燥汤，治法颇合，余即师其意用之，病果应手而效，惟效后，宜戒酒少劳方妙，否则食复劳复，甚易事耳。慎之！

《诊余举隅录》

张乃修

左。小溲结块如脂，膏淋重证也。

海金沙三钱 块滑石三钱 木猪苓二钱 泽泻一钱五分 淡秋石六分 赤白苓各三钱 黑山栀一钱五分
磨沉香四分，冲 大淡菜二只

又：结块已退，而溲带血。

车前子三钱 炒丹皮二钱 甘草梢五分 海金沙三钱 泽泻一钱五分 牛膝炭三钱 赤白苓各二钱

块滑石三钱 淡竹叶一钱

徐左。向有淋证，兹则马口不净，临洩作痛。湿热并阻膀胱，势难欲速图功。

车前子三钱 茯苓三钱 泽泻一钱 甘草梢八分 细木通八分 制半夏一钱五分 橘皮一钱 瞿麦三钱 牛膝炭四钱 淡竹叶一钱五分 朴硝一钱

又：阴柔苦泄，胃纳如常，然大便带红。脏阴虽亏，而腑中之湿热未清。以退为进。

侧柏炭一钱 炒槐花二钱 茯苓三钱 丹皮炭一钱五分 生牛膝四钱 橘白一钱 泽泻二钱 当归炭一钱五分 大补阴丸三钱，分两次开水下

徐左。淋浊之证，痛者为火，不痛者为湿。小洩之后，马口不净，其为湿流于下，显然可见。

萆薢 橘皮 生薏仁 猪茯苓 制半夏 块滑石 建泽泻 二妙丸

二诊：小洩虽不甚痛，而马口不净。还是湿热混淆，驾轻走熟。再利水而固精宫。

制半夏 焦苍术 川萆薢 川黄柏 猪苓 生熟薏 车前子 上广皮 赤白苓

徐左。下坠之气，仍不见松，气一下注，直入尿管，辄痛不能忍，有时由尿管而抵及肛门，亦然作痛，小洩滴沥不爽。右脉濡滑，左部细弱无力。良以肾气亏损，不能收摄。再咸润摄下。

干苁蓉三钱 大茴香八分，盐水炒 厚杜仲三钱 炒黑当归一钱五分 炒杞子三钱 菟丝子三钱，盐水炒 川断肉三钱 炒青盐一分五厘

二诊：盐润摄下，注痛稍退，而小洩乃沥不爽。肾气既虚，病根愈难澈也。

两头尖炒包 生蒲黄 当归尾 赤白苓 泽泻 柏子仁 生牛膝 川萆薢 韭菜根

三诊：小洩尚觉塞滞。水道之中，必有凝瘀内阻。再排湿化瘀，分清精水。

川萆薢 滑石 冬葵子三钱，研 细木通 牛膝梢 泽泻 石菖蒲盐水炒 甘草梢 西血珀三分 酒炒湘军五分，二味先调服

四诊：小洩已能约束，惟水道尚在窒塞，理宜逐步进逼。然天暑脉虚，不若暂为退守，乘机进治。

川萆薢 泽泻 生米仁 细木通 车前子 南楂炭 制半夏 黑山栀 牛膝梢 淡竹叶

五诊：湿浊瘀腐不化，小洩仍然窒滞，漩脚浊腻。再利水而排湿化瘀。

川萆薢二钱 白茯苓三钱 益智仁八分 瞿麦二钱 车前子二钱 篇蓄五分 牛膝梢三分 泽泻一钱五分，盐水炒 石菖蒲三分，盐水炒 木通五分 两头尖一钱五分，炒包

改方加单桃仁一钱五分，酒炒大黄二钱。

六诊：洩后每有牵腻之物渍于马口，为湿浊未楚之征。然小洩数而难固，心火陷入于肾，肾阴不摄。从心肾主治。

台参须八分 云茯神三钱 生山药三钱 潼沙苑三钱，盐水炒 细生地四钱 柏子霜三钱 远志肉七分 带心莲子三钱，打

李左。脉证相安，惟小便仍有牵腻之物。良以瘀腐未清。宜重药轻投。

制半夏 赤白苓 生薏仁 川萆薢 泽泻 猪苓 当门子七厘，杜牛膝汁半小酒杯调温服

此病已用通利数次矣。乃入房忍精，注于夹膜，故用此法祛之。（清儒附志）

二诊：服药后果有白物牵腻纠纠，离马口而下，惟隔日仍然。前方出入。
麝改五厘，牛膝汁一调羹入调。

施左。淋浊而于溲毕作痛，阴虚湿热下袭也。

秋石四分 牛膝梢三钱 生薏仁四钱 官桂四分 磨沉香四分，冲 草薢二钱 甘草梢五分 车前子三钱 藕汁一酒杯，冲

二诊：淋痛稍退。再清下焦湿热。

制半夏一钱五分 云茯苓二钱 牛膝梢三钱 泽泻一钱五分 广皮一钱 甘草梢五分 车前子三钱 龟甲心五钱，炙，先煎 二妙丸开水先服

以上出自《张聿青医案》

王旭高

包。劳碌气虚，湿热随之下陷。淋浊初起觉痛，今而木疼，但觉气坠，小便频数，色黄而浑浊不清。仿东垣补脾胃、去湿浊、泻阴火、升清阳方法。

黄芪盐水炒 柴胡 升麻 沙参 茯苓 芡实 草薢 黄柏 知母 灯心 食盐一捻，冲服

张。操觚莲幕，形逸心劳。肾水下亏不能上承于心，心阳内亢而反下趋于肾，即坎离之不交也。不交则诸病生，由是而下为淋浊尿血，宗筋绊痛；上为眩晕咳嗽，心中震跃，诊脉左小右大，内伤虚证何疑！今远道初归，跋涉劳顿，且拟和平补益，庶无畸重畸轻之病。

马料豆 甘草梢 茯神 怀山药 麦冬 建莲肉 沙参 红枣 鲜藕 枇杷叶

又：心阴耗损，君不制相，相火妄动，强阳常举，精浊时流，肛门气坠，大便溏薄，心中嘈辣，干嗽无痰。右脉空大，两尺皆虚。法宜补心阴以制相火，益肾气以固元精。

西洋参 黄柏 五味子 知母 牡蛎 大生地 龟板 麦冬

另补骨脂盐水炒，韭菜子盐水炒，研末，炼蜜为丸。每服三钱。

渊按：相火旺而肾阴亏极矣。二味为丸，专助肾阳，恐与此证不合。

严。淋浊三年不止，肾虚湿热不化。阴头碎痒，筋骨微疼。六味补肾，能化湿热。耐心久服，莫计效迟。

大生地 怀山药 茯苓 山萸肉 五味子 麦冬 益智仁 丹皮 泽泻 湘莲肉

高。淋浊而兼遗滑，耳聋目花。肝肾大虚，不宜渗利，法当固摄。

沙苑子 怀山药 破故纸 茯神 家韭子 芡实 龙骨 牡蛎

朝暮服威喜丸三钱。

渊按：纯属虚象，宜加熟地、山茱萸。

以上出自《王旭高临证医案》

姚龙光

张春山，患血淋偏坠，已近二旬，服药十余剂未效，吾嬖和叔之亲戚也，为恳予诊，至则

药煎出未服，予令姑缓，诊后再酌，诊得两脉弦数有力，约七八至，小解痛如刀割，所下皆血，现血止而点滴不出，小腹有筋，扛起痛甚，直入茎中，左囊下坠，因痛甚而目不交睫者十余日，往来寒热，口渴烦躁，面色通红，前医所用均柴、葛及香窜之味，余曰：前方误矣，不可再服，此少阳温证而兼血瘀尿管也。肝之脉络阴器，肝热重极致筋暴露，囊下坠，溺管为瘀所阻，而又为肝热所迫，故小便刻刻欲解而痛涩不能解出，为清解少阳而化瘀通络，则自愈矣。以青蒿、山梔仁、丹皮、赤芍、丹参、侧柏叶、茅草根为煎剂，以滑石、甘草梢、琥珀、海金沙、鲜牛膝捣汁为丸，与剂同服，连进三剂，小便通，痛止筋舒，寒热亦解，惟囊坠如旧，乃去丸剂，于前方中加荔枝核、橘核、山楂子，又服三剂而愈。

《崇实堂医案》

柳宝诒

王。湿热内蕴，乘下焦之虚，陷于膀胱。淋浊不爽，兼有瘀块。脉象细弦带数，苔腻微黄。法当先疏瘀滞，俾湿热通行，方可续议固摄。

粉草薷 猪苓 赤苓 泽泻 车前子 甘草梢 归尾炒 丹皮 黑山梔 川柏酒炙 春砂仁 莲子炒 淡竹叶 青麟丸 大黄、藿、朴、梔、归、柏、艾、姜、乳 每服一钱，灯心汤下。

陈。湿浊中壅，则相火不得疏越，两便均觉痛涩，而小便痛尤甚。脉象浮弦数硬，舌苔白腻。咳痰带黄，小水带血，皆浊热蒸郁之象。当疏泄郁火为主，取通则不痛之意。

鲜生地 木通 车前子 篇蓄 海金沙绢包 黑山梔 丹皮 归尾 牛膝梢 川柏酒炙 春砂仁研 丝瓜络 淡竹叶 灯心

另：西珀屑四分 炙乳香一分 酒炙大黄炭六分 血余炭一分 四味研细末，冲服。

童。血淋刺痛，瘀热内阻，病经月余，未得爽利，脉象弦数。当与疏瘀化热。

瞿麦 篇蓄 赤猪苓各 车前子 甘草梢 滑石 海金沙包 丹皮 黑山梔 赤芍 竹叶 归尾 灯心

另：真西珀四分 血余炭二分 大黄六分，酒炙炭 三味研末，冲服。

陶。血淋屡发，数年不已。谷道之前，痒而梗痛。脉象浮数，左手弦硬。湿热瘀浊挟相火并结于下。病虽日久，仍宜疏泄。

细生地 木通 甘草梢 车前子 海金沙绢包 瞿麦 牛膝梢 归尾 川柏 砂仁 丹皮 黑山梔 淡竹叶

另：真西珀研末冲服。

蒲。相火与湿热由肝下注，小便浊而不爽。法当清肝疏浊，俾瘀热得以通行，乃见松象。

草薷 猪苓 甘草梢 牛膝梢 黑山梔 丹皮 牡蛎 川柏 砂仁 银花 通草 竹叶 灯心

另：西珀屑四分 酒炙大黄炭八分 二味研末，冲服。